

四庫全書

子部

欽定四庫全書

子部

朱子語類卷一百一

詳校官中書臣程 炎

刑部郎中臣許兆椿覆勘

總校官中書臣朱 銓

校對官學正臣李 巍

謄錄舉人臣李元位

欽定四庫全書

朱子語類卷一百一

程子門人

摠論

問程門誰真得其傳曰也不盡見得如劉質夫朱公掞  
張思叔輩又不見他文字看程門諸公力量見識比  
之康節橫渠皆趕不上

程子門下諸公便不及所以和靖云見伊川不曾許一

人或問伊川稱謝顯道王佐才有諸和靖云見伊川說謝顯道好只是不聞王佐才之語劉子澄編續近

思錄取程門諸公之說某看來其間好處固多但終

不及程子難於附入

璘○必大錄云程門諸先生親從二程子何故看他不透子澄

編近思續錄某勸他不必作蓋接續二程意恩不得

伊川之門謝上蔡自禪門來其說亦有差張思叔最後進然深惜其早世使天予之年殆不可量其他門人多出仕宦四方研磨亦少楊龜山最老其所得亦深謙

謂思叔持守不及和靖乃伊川語非特爲品藻二人蓋有深意和靖舉以語人亦非自是乃欲人識得先生意耳若以其自是之嫌而不言則大不是將無處不空礙矣

鎬

呂與叔文集煞有好處他文字極是實說得好處如千兵萬馬飽滿伉壯上蔡雖有過當處亦自是說得透龜山文字却怯弱似是合下會得易某嘗說看文字須似法家深刻方窮究得盡某直是挾得下工

閻祖

上蔡多說過了龜山巧又別是一般巧得又不好范諫  
議說得不巧然亦好和靜又忒不巧然意思好振

問尹和靖立朝議論曰和靖不觀他書只是持守得好  
它語錄中說涵養持守處分外親切有些朝廷文字  
多是呂稽中輩代作問龜山立朝却有許多議論曰  
龜山雜博是讀多少文字德明

看道理不可不子細程門高弟如謝上蔡游定夫楊龜  
山輩下稍皆入禪學去必是程先生當初說得高了

他們只曉見一截少下面著實工夫故流弊至此

義剛

游楊謝三君子初皆學禪後來餘習猶在故學之者多

流於禪游先生大是禪學

德明

一日論伊川門人云多流入釋氏文蔚曰只是游定夫

如此恐龜山輩不如此曰只論語序便可見

文蔚

龜山少年未見伊川時先去看莊列等文字後來雖見伊川然而此念熟了不覺時發出來游定夫尤甚羅仲素時復亦有此意

恪

問程門諸公親見二先生往往多差互如游定夫之說  
多入於釋氏龜山亦有分數曰定夫極不濟事以某  
觀之二先生衣鉢似無傳之者又問上蔡議論莫太  
過曰上蔡好於事上理會理却有過處又問和靖專  
於主敬集義處少曰和靖主敬把得定亦多近傍理  
龜山說話頗淺狹范淳夫雖平正而亦淺又問嘗見  
震澤記善錄彼親見伊川何故如此之差曰彼只見  
伊川面耳曰中無倚著之語莫亦有所自來曰却是

伊川語可學

游楊謝諸公當時已與其師不相似却似別立一家謝氏發明得較精彩然多不穩貼和靖語却實然意短不似謝氏發越龜山語錄與自作文又不相似其文大故照管不到前面說如此後面又都反了緣他只依傍語句去皆是不透龜山年高與叔年四十七他文字大綱立得腳來健多有處說得好又切若有壽必然進游定夫學無人傳無語錄他晚年嗜佛在江

湖居多有尼出入其門他眼前分曉信得及底儘踐履得到其變化出入處看不出便從釋去亦是不透

和靖在虎丘每旦起頂禮佛

鄭曰亦念  
金剛經

他因趙相入

侍講筵那時都說不出都柰何不得人責他事業答

曰每日只講兩行書如何做得到致君澤民事業高宗

問程某道孟子如何答曰程某不敢疑孟子如此則

是孟子亦有可疑處只不敢疑爾此處更當下兩語

却住了他也因患難後心神耗了龜山那時亦不應

出侯師聖太麓踈李先生甚輕之來延平看親羅仲  
素往見之坐少時不得只管要行此亦可見其麓踈  
處張思叔敏似和靖伊川稱其朴茂然亦狹無展拓  
氣象收得他雜文五六篇其詩都似禪緣他初是行  
者出身郭沖晦有易文字說易卦都從變上推問一  
二卦推得豈可都要如此近多有文字出無可觀周  
恭叔謝用休趙彥道鮑若雨那時溫州多有人然都  
無立作王信伯乖鄭問它說中無倚著又不取龜山

不偏說何也曰他謂中無偏倚故不取不偏說鄭曰  
胡文定只上蔡處講得些子來議論全似上蔡天自處等曾漸又胡文定處講得些子曰文定愛將聖人  
道理張大說都是勉強如此不是自然流出曾漸多  
是禪淳

學者氣質上病最難救如程門謝氏便如師也過游與  
楊便如商也不及皆是氣質上病向見無爲一醫者  
善用鍼嘗云是病可以鍼而愈惟胎病爲難治必大

蔡云不知伊川門人如此其衆何故後來更無一人見得親切或云游楊亦不久親炙曰也是諸人無頭無尾不曾盡心存上面也各家去奔走仕宦所以不能理會得透如邵康節從頭到尾極終身之力而後得之雖其不能無偏然就他這道理所謂成而安矣如茂叔先生資稟便較高他也去仕宦只他這所學自是從合下直到後來所以有成某看來這道理若不是拚生盡死去理會終不解得書曰若藥不瞑眩厥

疾不瘳須是喫些苦極方得蔡云上蔡也雜佛老曰  
只他見識又高蔡云上蔡老氏之學多龜山佛氏之  
說多游氏只雜佛呂與叔高於諸公曰然這大段有  
筋骨惜其早死若不早死也須理會得到蔡又因說  
律管云伊川何不理會想亦不及理會還無人相共  
理會然康節所理會伊川亦不理會曰便是伊川不  
肯理會這般所在

賀孫

程門諸子在當時親見二程至於釋氏却多看不破是

不可曉觀中庸說中可見如龜山云吾儒與釋氏其  
差只在杪忽之間某謂何止杪忽直是從源頭便不  
同伯豐問崇正辨如何曰崇正辨亦好伯豐曰今禪  
學家亦謂所辨者皆其門中自不以爲然曰不成吾  
儒守三綱五常若有人道不是亦可謂吾儒自不以  
爲然否又問此書只論其迹曰論其迹亦好伊川曰  
不若只於迹上斷畢竟其迹是從那裏出來胡明仲  
做此書說得明白若五峯說話中辨釋氏處却糊塗

關他不倒皇王大紀中亦有數段亦不分曉

嘗

上蔡之學初見其無礙甚喜之後細觀之終不離禪底  
見解如灑掃應對處此只是小子之始學程先生因  
發明雖始學然其終之大者亦不離乎此上蔡於此  
類處便說得大了道理自是有小有大有初有終若  
如此說時便是不安於其小者初者必知其中有所  
謂大者方安爲之如曾子三省處皆只是實道理上  
蔡於小處說得亦大了記二先生語云才得後便放

開不然只是守此語記亦未備得了自然開如何由人放開此便是他病處諸家語錄自然要就所錄之人看上蔡大率張皇不妥帖更如游揚解書之類多使聖人語來反正如解不亦樂乎便云學之不講爲憂有朋友講習豈不樂乎之類亦不自在大率諸公雖親見伊川皆不得其師之說振

程門弟子親炙伊川亦自多錯蓋合下見得不盡或後來放倒蓋此理無形體故易差有百般滲漏去僞

程門諸高弟覺得不快於師說只爲他自說得去

文蔚

古之聖賢未嘗說無形影詰近世方有此等議論蓋見

異端好說玄說妙思有以勝之故亦去玄妙上尋不

知此正是他病處如孟子說反身而誠本是平實伊

川亦說得分明到後來人說時便如空中打箇筋斗

然方其記錄伊川語元不錯及自說出來便如此必

是聞伊川說時實不得其意耳

必大

問郭冲晦何如人曰西北人氣質重厚淳固但見識不

及如兼山易中庸義多不可曉不知伊川晚年接人  
是如何問游楊諸公早見程子後來語孟中庸說先  
生猶或以爲踈畧何也曰游楊諸公皆才高又博洽  
略去二程處參較所疑及病敗處各能自去求雖其  
說有踈略處然皆通明不似兼山輩立論可駭也德明

周恭叔學問自是靠不得

方

朱公掞文字有幅尺是見得明也

方

南軒云朱公掞奏狀說伊川不著先生云不知如何方

是說著大意只要說得實便好如伊川說物便到四  
凶上及呂與叔中庸皆說實話也

方

李朴先之大槩是能尊尚道學但恐其氣剛亦未能遜

志於學問

道夫

學者宜先看遺書次看和靖文字後乃看上蔡文字以  
發光彩且已可不迷其說也

方附季  
通語

呂與叔

呂與叔惜乎壽不永如天假之年必所見又別程子稱

其深潛縝密可見他資質好又能涵養某若只如呂年亦不見得到此田地矣五福說壽爲先者此也

友仁

有爲呂與叔挽詩云曲禮三千目躬行四十年

方

呂與叔中庸義典實好看又有春秋周易解

方

呂與叔云聖人以中者不易之理故以之爲教如此則是以中爲一好事用以立教非自然之理也先生曰此是橫渠有此說所以橫渠沒門人以明誠中子謚之與叔爲作謚議蓋支離也西北人勁直才見些理

便如此行去又說出時其他又無人曉只據他一面說去無朋友議論所以未精也

根

呂與叔本是箇剛底氣質涵養得到所以如此故聖人以剛之德爲君子柔爲小人若有其剛矣須徐去那剛之病全其與剛之德相次可以爲學若不剛終是不能成

有爲而  
言○卓

看呂與叔論選舉狀立士規以養德厲行更學制以量才進藝定貢法以取賢歛才立試法以試用養才立

辟法以興能備用立舉法以覆實得人立考法以責任考功先生曰其論甚高使其不死必有可用

呂與叔後來亦看佛書朋友以書責之呂云某只是要看他道理如何其文集上雜記亦多不純想後來見二程了却好

呂與叔集中有與張天驥書是天驥得一書與他云我心廣大如天地視其形體之身但如螻蟻此也不足辨但偶然是有此書張天驥便是東坡與他做放鶴

亭記者即雲龍處士徐州人心廣大後方能體萬物  
蓋心廣大則包得那萬物過故能體此體猶體羣臣  
之體

義剛

呂與叔論顏子等處極好龜山云云未是

可學

呂與叔有一段說輪回

可學

謝顯道

上蔡高邁卓絕言論宏肆善開發人

若海

上蔡語雖不能無過然都是確實做工夫來

道夫

問人之病痛不一各隨所偏處去上蔡才高所以病痛盡在矜字曰此說是人傑

謝氏謂去得矜字後來矜依舊在說道理愛揚揚地淳

或問謝上蔡以覺言仁是如何曰覺者是要覺得箇道理須是分毫不差方能全得此心之德這便是仁若但知得箇痛癢則凡人皆覺得豈盡是仁者耶醫者以頑痺爲不仁以其不覺故謂之不仁不覺固是不仁然便謂覺是仁則不可時舉

問上蔡說仁本起於程先生引醫家之說而誤曰伊川有一段說不認義理最好只以覺爲仁若不認義理只守得一箇空心覺何事可學

上蔡以知覺言仁只知覺得那應事接物底如何便喚做仁須是知覺那理方是且如一件事是合做與不合做覺得這箇方是仁喚著便應抉著便痛這是心之流注在血氣上底覺得那理之是非這方是流注在理上底喚著不應抉著不痛這箇是死人固是不

仁喚得應抉著痛只這便是仁則誰箇不會如此須  
是分作三截看那不聞痛癢底是不仁只覺得痛癢  
不覺得理底雖會於那一等也不便是仁須是覺這  
理方是植

問謝氏以覺訓仁謂仁爲活物要於日用中覺得活物  
便見仁體而先生不取其說何也曰若是識得仁體  
則所謂覺所謂活物皆可通也但他說得自有病痛  
畢竟如何是覺又如何是活物又却別將此箇意思

去覺那箇活物方寸紛擾何以爲仁如說克已復禮已在何處克又如何豈可以活物覺之而已也謨

問上蔡以覺訓仁莫與佛氏說異若張子韶之說則與上蔡不同曰子韶本無定論只是迅筆便說不必辨其是非某云佛氏說覺却只是說識痛癢曰上蔡亦然又問上蔡說覺乃是覺其理曰佛氏亦云覺理此一

段說未盡客  
至起○可學

上蔡云釋氏所謂性猶吾儒所謂心釋氏所謂心猶吾

儒所謂意此說好

閻祖

問上蔡說佛氏目視耳聽一段比其它說佛處此最當  
曰固是但不知渠說本體是何性若不指理却錯了  
可學

因論上蔡語錄中數處如云見此消息不下工夫之類  
乃是謂佛儒本同而所以不同但是下截耳龜山亦  
如此某謂明道云以吾觀於佛疑於無異然而不同  
曰上蔡有觀復堂記云莊列之徒云云言如此則是

聖人與莊列同只是言有多寡耳觀它說復又却與伊川異似以靜處爲復湖州刻伊川易傳後有謝跋云非全書伊川嘗約門人相聚共改未及而沒使當初若經他改豈不錯了龜山又有一書亦改刪伊川易遺書中謝記有一段下注云鄭轂親見轂嘗云曾見上蔡每說話必覆巾掀髯攘臂方錄云鄭轂言上蔡平日說話到掀舉處必反袖以見精采某曰若他與朱子發說論語大抵是如此曰以此語學者不知使之從何入頭可學

上蔡觀復齋記中說道理皆是禪學底意思

義剛

問上蔡學佛欲免輪回一段曰答辭似不甚切

可學

上蔡語錄論佛處乃江民表語民表爲諫官甚有可觀

只是學佛當初是人寫江語與謝語共一冊遂誤傳

作謝語唯室先生陳齊之有辨此甚明

璘

國秀問上蔡說橫渠以禮教人其門人下梢頭低只溺於刑名度數之間行得來困無所見處如何曰觀上蔡說得又自偏了這都看不得禮之大體所以都易

得偏如上蔡說橫渠之非以爲欲得正容謹節這自然是好如何廢這箇得如專去理會刑名度數固不得又全廢了這箇也不得如上蔡說便非曾子蘧豆則有司存本末並見之意後世如有作者必不專泥於刑名度數亦只整頓其大體如孟子在戰國時已自見得許多瑣碎不可行故說喪服經界諸處只是理會大體此便是後來要行古禮之法

賀孫

問上蔡云陰陽交而有神形氣離而有鬼知此者爲智

事此者爲仁上兩句只是說伸而爲神歸而爲鬼底  
意思曰是如此問事此者爲仁只是說能事鬼神者  
必極其誠敬以感格之所以爲仁否曰然問謝又云  
可者使人格之不使人致死之可者是可以祭祀底  
否曰然問禮謂致生爲不知此謂致生爲知曰那只  
是說明器如三日齋七日戒直是將做箇生底去祭  
他方得問謝又云致死之故其鬼不神曰你心不向  
他便無了問且如淫祠自有靈應如何便會無曰昔

一僧要破地獄人教他念破地獄呪徧無討這呪處  
一僧與云遍觀法界性四句便是或云只是一切惟  
心造曰然又問齋戒只是要團聚自家精神然自家  
精神即祖考精神不知天地山川鬼神亦只以其來  
處一般否曰是如此天子祭天地諸侯祭封內山川  
是他是主如古人祭墓亦只以墓人爲戶

胡泳

鬼神上蔡說得好只覺得陰陽交而有神之說與後神  
字有些不同只是他大綱說得極好如曰可者使人

格之不使人致死之可者是合當祭如祖宗父母只  
須著盡誠感格之不要人便做死人看待他不可者  
使人遠之不使人致生之不可者是不當祭如閒神  
野鬼聖人便要人遠之不要人做生人看待他可者  
格之須要得他來不可者遠之我不管他便都無了  
精氣爲物遊魂爲變天地陰陽之氣交合便成人物  
到得魂氣歸於天體魄降於地是爲鬼便是變了說  
魂則魄可見

賀孫

叔器問上蔡說鬼神云道有便有道無便無初看此二句與有其誠則有其神無其誠則無其神一般而先生前夜言上蔡之語未穩如何曰有其誠則有其神無其誠則無其神便是合有底我若誠則有之不誠則無之道有便有道無便無便是合有底當有合無底當無上蔡而今都說得麤了合當道合有底從而有之則有合無底自是無了便從而無之今却只說道有便有道無便無則不可

義剛

上蔡言鬼神我要有便有

以天地祖考之類

要無便無以非其

鬼而祭之者爾氣一正而行則彼氣皆散矣

揚

上蔡曾有手簡云大事未辦李先生謂不必如此死而

後已何時是辦

方

上蔡曰人不可無根便是難所謂根者只管看便是根不是外面別討箇根來

上蔡說先有知識以敬涵養似先立一物了

方

上蔡云誠是實理不是專說是理後人便只於理上說

不於心上說未是

可學

上蔡言無窮者要當會之以神是說得過當只是於訓

詁處尋繹蹊履去自然下學上達

賀孫

上蔡云見於作用者心也謂知而動者便是先生云本

體是性動者情兼體動靜者心

性靜方○以下數情動也條方問上蔡

養心不如悅心先生云不如字恐有之淺近字恐伊川未必爾此錄已傳兩手可疑悅心說更舉出處看理

錄語

義是本有自能悅心在人如行慊於心

心之窮物有盡而天者無盡先生云得其本則用之無窮不須先欲窮知其無窮也

放開只守追記語中說得頗別似謂放開是自然豁開乃得之効未得則只是守此錄中語不安

敬則與事爲一先生云此與明道伊川說別今胡文定一派要身親格者是宗此意

說何思何慮處伊川本不許上蔡却自擔當取也讀語及錄

易傳可見

○這同上

上蔡家始初極有好玩後來爲克己學盡舍之後來有一好硯亦把與人方

曾恬天隱嘗問上蔡

云云

上蔡曰用得底便是以其說

絮故答以是又嘗問恭敬字同異曰異如何異曰恭

平聲敬仄聲上蔡英發故胡文定喜之想見與游楊

說話時悶也

楊

如今人說道愛從高妙處說便說入禪去自謝顯道以

來已然向時有一陳司業名可中專一好如此說如  
說如何是伊尹樂堯舜之道他便去下面下一語云  
江上一犁春雨如此等類煞有亦煞有人從它只是  
不靠實自是說他一般話

謙

楊中立

龜山天資高朴實簡易然所見一定更不須窮究某嘗  
謂這般人皆是天資出人非假學力如龜山極是簡  
易衣服也只據見定終日坐在門限上人犯之亦不

較其簡率皆如此

道夫○韓嘗聞先生云坐在門外石坐子上今云門限記之誤也○

方錄云龜山有時坐門限上李先生云某即斷不敢

龜山解文字著述無綱要

方

龜山文字議論如手捉一物正緊忽墜地此由其氣弱  
龜山詩文說道理之類才說得有意思便無收殺楊曰  
是道理不透否曰雖然亦是氣質弱然公平無病五  
峯說得却緊然却有病程先生少年文字便好如養  
魚記顏子論之類

楊

龜山言天命之謂性人欲非性也天命之善本是無人  
欲不必如此立說知言云天理人欲同體而異用同  
行而異情自是它全錯看了

德明

龜山與范濟美言學者須當以求仁爲要求仁則剛毅  
木訥近仁一言爲要先生曰今之學者亦不消專以  
求仁爲念相將只去看說仁處他處盡遺了須要將  
一部論語粗粗細細一齊理會去自然有貫通處却  
會得仁方好又今人說曾子只是以魯得之蓋曾子

是資質省力易學設使如今人之魯也不濟事范濟美博學高才俊甚故龜山只引剛毅木訥告之非定理也

問龜山言道非禮則蕩而無止禮非道則梏於器數儀章之末則道乃是一虛無恍惚無所準則之物何故如此說道字曰不可曉此類甚多因問如此說則似禪矣曰固是其徒如蕭子莊李西山陳默堂皆說禪龜山沒西山嘗有佛經疏追薦之唯羅先生却是著

實子細去理會某舊見李先生時說得無限道理也  
曾去學禪李先生云汝恁地懸空理會得許多而面  
前事却又理會不得道亦無玄妙只在日用間著實  
做工夫處理會便自見得後來方曉得它說故今日  
不至無理會耳

銖

龜山禪蔡京亦是只不迅速擇之曰龜山晚出一節亦  
不是曰也不干晚出事若出來做得事也無妨他性  
慢看道理也如此平常處看得好緊要處却放緩了

做事都渙散無倫理將樂人性急驪率龜山却恁寬平此是間氣然其驪率處依舊有土風在

義剛

或問龜山晚年出處不可曉其召也以蔡京然在朝亦無大建明曰以今觀之則可以追咎當時無大建明若自家處之不知當時所以當建明者何事或云不過擇將相爲急曰也只好說擇將相固是急然不知當時有甚人可做當時將只說种師道相只說李伯紀然固皆嘗用之矣又况自家言之彼亦未便見聽

據當時事勢亦無可爲者不知有大聖賢之才如何

爾備

問龜山晚年出得是否曰出如何不是只看出得如何

當初若能有所建明而出則勝於不出曰渠用蔡攸

薦蔡老令

攸薦之

亦未是曰亦不妨當時事急且要速得一

好人出來救之只是出得來不濟事耳觀渠爲諫官

將去猶惓惓於一對已而不得對及觀其所言第一

正心誠意意欲上推誠待宰執第二理會東南綱運

當時宰執皆庸繆之流待亦不可不行亦不可不告以窮理而告以正心誠意賊在城外道途正梗縱有東南綱運安能達所謂雖有粟安得而食諸當危急之時人所屬望而著數乃如此所以使世上一等人笑儒者以爲不足用正坐此耳

可學

草堂先生及識元城龜山龜山之出時已七十歲却是從蔡攸薦出他那時覺得這邊扶持不得事勢也極故要附此邊人所以薦龜山初緣蔡攸與蔡子應說

令其薦舉人才答云太師用人甚廣又要討甚麼人  
曰緣都是勢利之徒恐緩急不可用有山林之人可  
見告他說某只知鄉人鼓山下張鬚字柔直其人甚  
好蔡攸曰家間子姓未有人教可屈他來否此人即  
以告張張即從之及教其子弟儼然正師弟子之分  
異於前人得一日忽聞諭其子弟以奔走之事其子  
弟駭愕即告之曰若有賊來先及汝等汝等能走乎  
子弟益驚駭謂先生失心以告老蔡老蔡因悟曰不

然他說得是蓋京父子此時要喚許多好人出已知事變必至即請張公叩之張言天下事勢至此已不可救只得且收舉幾箇賢人出以爲緩急倚仗耳即令張公薦人張公於是薦許多人龜山在一人之數今龜山墓誌云會有告大臣以天下將變宜急舉賢以存國於是公出正謂此張後爲某州縣丞到任即知金人入寇必有自海道至者於是買木爲造船之備踰時果然金自海入寇科州縣造舟倉卒擾擾油

灰木材莫不踊貴獨張公素備不勞而辦以此見知  
於帥憲知南劖會葉鐵入寇民大恐他即告諭安存  
之率城中諸富家令出錢木沽酒買肉爲蒸糊之類  
遂分民兵作三替逐替燕犒酒食授以兵器先一替  
出城與賊接戰即犒第二替出先替未倦而後替即  
得助之民大喜遂射殺賊首富民中有識葉鐵者即  
厚勞之勿令執兵只令執長鎗上懸白旗令見葉鐵  
即以白旗指向之衆上了弩即其所指而發遂中之

後都統任某欲爭功亦讓與之其餘諸盜却得都統之力放賊之叔父以成反間用錄別出

問龜山出處之詳曰蔡京晚歲漸覺事勢狼狽亦有隱憂其從子應之文蔚錄云君謨之孫與他叙譜自興化來因訪問近

日有甚人才應之愕然曰今天下人才盡在太師陶鑄中某何人敢當此問京曰不然覺得目前盡是面諛脫取官職去底人恐山林間有人才欲得知應之曰太師之間及此則某不敢不對福州有張肅字柔

直者抱負不苟鄙平日與應之相好時適赴吏部應  
之因舉其人以告遂賓致之爲塾客然亦未暇與之  
相接柔直以師道自尊待諸生嚴厲異於他客諸生  
已不能堪一日呼之來前曰汝曹曾學走乎諸生曰  
某尋常聞先生長者之教但令緩行柔直曰天下被  
汝翁作壞了早晚賊發火起首先到汝家若學得走  
緩急可以逃死諸子大驚走告其父曰先生忽心恙  
云云京聞之瞿然曰此非汝所知也即入書院與柔

直傾倒因訪策焉柔直曰今日救時已是遲了只有收拾人才是第一義京因叩其所知遂以龜山爲對龜山自是始有召命今龜山墓誌中有是時天下多故或說當世貴人以爲事至此必敗宜引耆德老成置諸左右開道上意云者蓋爲是也柔直後守南劖設方略以拒范汝爲全活一城甚得百姓心其去行在所也買冠梳雜碎之物不可勝數從者莫測其所以後過南劖老稚迎拜者相屬於道柔直一一拊勞之

且以所置物分遺至今廟食郡中

陳德本云柔直與李丞相極厚善其

卒也

丞相以詩哭之云中原未恢復天乃喪斯人儒

用按

鄉先生羅秘丞日錄柔直嘗知龍州祕丞罷舒

州士曹避地于鄉之石牛寨與之素昧平生時方道

梗柔直在湖南乃宛轉寄詩存問云曾聞避世門金

馬何事投身塞石牛千里重湖方鼎沸可能同上岳

陽樓則其汲汲人物之意亦可見矣是詩夷堅志亦

載但以爲袁司諫作非也又按玉溪

文集云柔直嘗知贛州招降盜賊云

蔡京在政府問人材於其族子蔡子應

端明之孫

以張柔直

對張時在部注擬京令子應招之授以門館張至以

師禮自尊京之子弟怪之一日張教京家子弟習走

其子弟云從來先生教某們慢行今令習走何也張  
云乃公作相久敗壞天下相次盜起先殺汝家人惟  
善走者可脫何得不習家人以爲心風白京京愀然  
曰此人非病風召與語問所以扶救今日之道及人  
材可用者張公遂言龜山楊公諸人姓名自是京父  
子始知有楊先生

德明

問龜山當時何意出來曰龜山做人也苟且是時未免  
祿仕故胡亂就之苟可以少行其道龜山之志也然

來得已不是及至又無可爲者只是說得那沒緊要  
底事當此之時苟有大力量咄嗟間真能轉移天下  
之事來得也不枉既不能然又只是隨衆鶻突及欽  
宗即位爲諫議大夫因爭配享事爲孫仲益所攻孫  
言揚某曩常與蔡京諸子游今衆議攻京而楊某曰  
慎母攻居安云云龜山遂罷又曰蔡京當國時其所  
收拾招引非止一種諸般名色皆有及淵聖即位在  
朝諸人盡攻蔡京且未暇顧國家利害朝廷若索性

貶蔡京遇嶺也得一事了今日去幾官分司西京明日去幾官又移某州後日又移某州至潭州而京病死自此一年間只理會得箇蔡京這後面光景迫促了金人之來已不可遏矣京有四子攸條脩條尚主條曾以書諫其父徽宗怒令京行遣一家弄得不成模樣更不堪說攸條後被斬是時王黼童貫梁師成輩皆斬此數人嘗欲廢立欽宗平日不平之故也及高宗初立時猶未知辨别元祐熙豐之黨故用汪

黃不成人才。汪黃又小人中之最下。最無能者及趙丞相居位方稍能辨别。亦緣孟后居中力與高宗說得透了。高宗又喜看蘇黃輩文字。故一旦覺悟而自惡之。而君子小人之黨始明。惆

龜山裂裳裹足。自是事之變。在家亦無可爲。雖用治蠱之說。然文定云。若從其言。亦救得一半。先生云。若用其言。則議論正。議論正。則小人不得用。然龜山亦言天下事當時排正論者。耿南仲。馮澥二人之力爲多。二人竟敗。

國南仲上言或者以王氏學不可用陛下觀祖宗時  
道德文學人才兵力財用能如熙豐時乎陛下安可  
輕信一人之言以變之批答云頃以言者如何如何  
今聞師傅之臣言之如此若不爾幾誤也前日指揮  
更不施行

方

聞龜山晚歲一出爲士子詬罵果有之否曰他當時一  
出追奪荆公王爵罷配享夫子且欲毀壞三經板土  
子不樂遂相與聚問三經有何不可輒欲毀之當時

龜山亦謹避之間或者疑龜山此出爲無補於事徒爾紛紛或以爲大賢出處不可以此議如何曰龜山此行固是有病但只後人又何曾夢到他地位在惟胡文定以柳下惠援而止之而止比之極好道夫

龜山之出人多議之惟胡文定之言曰當時若能聽用決須救得一半此語最公益龜山當此時雖負重名亦無殺活手段若謂其懷蔡氏汲引之恩力庇其子至有謹勿擊居安之語則誣矣幸而此言出於孫覲

人自不信

儒用

坐客問龜山立朝事曰胡文定論得好朝廷若委吳元忠輩推行其說決須救得一半不至如後來狼狽然當時國勢已如此金初退後便須急急理會如救焚拯溺諸公今日論蔡京明日論王黼當時姦黨各已行遣了只管理會不休擔閣了日子如吳元忠李伯紀向來亦是蔡京引用免不得略遮庇只管喫人議論龜山亦被孫覲輩窘擾

德明

問龜山云消息盈虛天且不能暴爲之去小人亦不可

驟如何曰只看時如何不可執天亦有迅雷風烈之

時

德明

伯夷微似老子胡文定作龜山墓誌主張龜山似柳下

惠看來是如此

閻

孫覲見龜山撰曾內翰行狀曰楊中立却會做文字先生曰龜山曾理會文字來

李先生嘗云人見龜山似不管事然甚曉事也

方

李先生言龜山對劉器之言爲貧文定代云干木 云云

不若龜山之遜避也

汪書延李初至見便問之未竟李疾作○方

龜山張皇佛氏之勢

說橫渠不能屈之爲城下之盟

亦如李鄴張皇金

人也

龜山嘗稱李奉使還云金人上馬如龍步行如虎度水如獺登城如猿時人目爲四如給事○

方

問橫浦語錄載張子韶戒殺不食蠣高抑崇相對故食之龜山云子韶不殺抑崇故殺不可抑崇退龜山問子韶周公何如人對曰仁人曰周公驅猛獸兼夷狄

滅國者五十何嘗不殺亦去不仁以行其仁耳先生  
曰此特見其非不殺耳猶有未盡須知上古聖人制  
爲網罟佃漁食禽獸之肉但君子遠庖厨不暴殄天  
物須如此說方切事情

德明

龜山銘誌不載高麗事他引歐公作梅聖俞墓誌不載  
布文詩事辨得甚好孰能識車中之狀意欲施之事  
見韓詩外傳

道夫

龜山墓誌首尾却是一篇文字

後來不曾在用○方

游定夫

游定夫德性甚好

升卿

游定夫徽廟初爲察院忽申本臺乞外如所請志完駭之定夫云公何見之晚如公亦豈能久此

方

侯希聖

胡氏記侯師聖語曰仁如一元之氣化育流行無一息間斷此說好

閻祖

李先生云侯希聖嘗過延平觀其飲咱麤躁人也

方

尹彥明

和靖在程門直是十分鈍底被他只就一箇敬字做工

夫終被他做得成

節

和靖守得緊但不活

蓋卿

和靖持守有餘而格物未至故所見不精明無活法

升卿

和靖才短說不出只緊守伊川之說

去僞

和靖諦當又云就諸先生立言觀之和靖持守得不失然才短推闡不去遇面生者說得頗艱

方

和靖守得謹見得不甚透如俗語說他只是抱得一箇

不哭底孩兒

義剛

問和靖言先生教人只是專令用敬以直內一段未盡  
曰和靖才力短伊川就上成就它亦據其所聞而  
守之便以爲是

可學

自其上者言之有明未盡處自其下者言之有明得一  
半便謂只是如此尹氏亦只是明得一半便謂二程  
之教止此孔孟之道亦只是如此惟是中人之性常

常著力照管自家這心要常在須是窮得透徹方是  
敬仲

和靖只是一箇篤實守得定如涪州被召祭伊川文云  
不背其師則有之有益於世則未也因言學者只守  
得某言語已自不易少間又自轉移了炎言

和靖說主一與祁居之云如人入神廟收斂精神何物  
可入得有所據守方

和靖主一之功多而窮理之功少故說經雖簡約有益

學者但推說不去不能大發明在經筵進講少開悟  
啓發之功紹興初入朝滿朝注想如待神明然亦無  
大開發處是時高宗好看山谷詩尹云不知此人詩  
有何好處陛下看它作什麼只說得此一言然只如  
此說亦何能開悟人主大抵解經固要簡約若告人  
主須有反覆開導推說處使人主自警省蓋人主不  
比學者可以令他去思量如孔子答哀公顏子好學  
之問與荅季康子詳畧不同此告君之法也

銖

和靖當經筵都說不出張魏公在蜀中一日招和靖語  
之人有不爲也而後可以有爲此孟子至論和靖曰  
未是張曰何者爲至和靖曰好善優於天下爲至先  
生曰此和靖至論極中張病然正好發明惜但此而  
止耳張初不喜伊洛之學故諫官有言和靖適召至  
九江見其文辭之張皇恐再薦和靖持守甚確凡遇  
飲手足在一處醉後亦然

揚

胡文定初疑尹和靖後見途中辭召表方知其真有得

表言臣師程某今來亦不過守師之訓變所守又何取云云之意時陳公輔論伊川學故途中進此表尹亦只得如此辭文定以此取之亦未可見尹所得處揚

尹子之學有偏處渠所見伊川將朱公掞所抄語錄去呈想是他爲有看不透處故伊川云某在何必觀此書蓋謂不如當面與它說耳尹子後來遂云語錄之類不必看不知伊川固云某在不必觀今伊川既不

在如何不觀又如云易傳是伊川所自作者其他語錄是學者所記故謂只當看易傳不當看語錄然則夫子所自作者春秋而已論語亦門人所記也謂學夫子者只當看春秋不當看論語可乎

審

尹和靖疑伊川之說多其所未聞

辨

王德修相見先生問德修和靖大槩接引學者話頭如何德修曰先生只云在力行曰力行以前更有甚工夫德修曰尊其所聞行其所知曰須是知得方始行

得德修曰自吾十有五而志於學以至從心所欲不踰矩皆是說行曰便是先知了然後志學

文蔚

問天地設位而易行乎其中矣和靖言行錄云易行乎其中聖人純亦不已處莫說得太拘天地設位而易行乎其中矣如言天高地下萬物散殊而禮制行乎其中無適而非也今只言聖人純亦不已莫太拘了曰亦不是拘他說得不是陰陽升降便是易易者陰陽是也

文蔚

和靖與楊畏答問一段語殊無血脉謂非本語極是龜  
山說得固佳然亦出於程子羈勒以御馬而不以制  
牛胡不乘牛而服馬之說鎬

人之所畏不得不畏此是和靖見未透處亦是和靖不  
肯自欺屈強妄作處鎬

和靖赴樂會聽曲子皆知之亦歡然但拱手安足處終  
日未嘗動也在平江時累年用一扇用畢置架上凡  
百嚴整有常有僧見之云吾不知儒家所謂周孔爲

如何然恐亦只如此也

王德修言一日早起見和靖使人傳語令且坐候看經了相見少頃和靖出某問曰先生看甚經曰看光明經某問先生何故看光明經曰老母臨終時令每日看此經一部今不敢違老母之命先生曰此便是平日闢却那諭父母於道一節便致得如此

文蔚

張思叔

張思叔與人做恩堂記言世間事有當思者有不當思

者利害生死不當思也如見某物而思終始之云云  
此當思也

方

郭立之

子和

郭子和傳其父學又兼象數其學已雜又被謝昌國拈  
掇得愈不是了且如九圖中性善之說性豈有兩箇  
善又安有内外故凡惡者皆氣質使然若去其惡則  
見吾性中當來之善語又問郭以兼山學自名是其  
學只一艮卦曰易之道一箇艮卦可盡則不消更有

六十三卦又曰謝昌國論西銘理一而分殊尤錯了  
去僞

郭子和性論與五峰相類其言曰目視耳聽性也此語  
非也視明而聽聰乃性也箕子分明說視曰明聽曰  
聰若以視聽爲性與僧家作用是性何異五峰曰好  
惡性也君子好惡以道小人好惡以欲君子小人者  
天理人欲而已矣亦不是蓋好善惡惡乃性也 磲

胡康侯

雖非門人而嘗見謝  
楊今附○子姪附

或問胡文定之學與董仲舒如何曰文定却信得於已者可以施於人學於古者可以行於今其他人皆謂得於已者不可施於人學於古者不可行於今所以淺陋然文定比似仲舒較淺仲舒比似古人又淺又曰仲舒識得本原如云正心修身可以治國平天下如說仁義禮樂皆其具此等說話皆好若陸宣公之論事却精密第恐本原處不如仲舒然仲舒施之臨事又却恐不如宣公也

學業

文定大綱說得正微細處五峯尤精大綱却有病

方

胡文定說較疎然好五峯說密然有病

問文定言人常令胷中自在云

克已無欲○方

文定氣象溫潤却似貴人

方

原仲說文定少時性最急嘗怒一兵士至親毆之兵輒

抗拒無可如何遂回入書室中作小冊盡寫經傳中

文有寬字者於冊上以觀玩從此後遂不性急矣

方

胡文定云知至故能知言意誠故能養氣此語好又云

豈有見理已明而不能處事者此語亦好

夔孫

胡文定公傳家錄議論極有力可以律貪起懦但以上

工夫不到如訓子弟作郡處末後說道將來不在人  
下便有克伐之意子升云有力行之意多而致知工

夫少曰然

未之

問文定靖康第二劄如何云君相了得亦不必定其規  
模不然亦須定其大綱專戰專和專守之類可定  
揚文定論時事要掃除故迹乘勢更張龜山論時用其蠱

卦說且扶持苟完

龜山語見荅胡康侯第八書中止謂役法冗官二事而已非盡然也

伊川有從本言者有從末言者從末言小變則小益

大變則大益包荒傳云以含洪之體爲剛果之用

方

胡文定公云世間事如浮雲流水不足留情隨所寓而安也寅近年却於正路上有箇見處所以立朝便不

碌碌與往日全不同往時虛憇恃氣今則平心觀理

矣

振

曾吉甫答文定書中天理人欲之說只是籠罩其實初

不曾見得文定便許可之它便只如此住了

當

胡文定初得曾文清時喜不可言然已仕宦駸駸了又

參禪了如何成就得他

揚

向見藉溪說文定當建炎間兵戈擾攘寓荆門擬遷居  
適湘中有兩士人協力具舟楫往迎文定其一人乃  
黎才翁文定始亦有遲疑之意及至湘中則舍宇動  
用便利如歸處之極安又聞范文說文定得碧泉甚  
愛之有本亭記所謂命門弟子往問津焉即才翁也

佐

胡致堂之說雖未能無病然大抵皆太過不會不及如今學者皆是不及

學蒙○以  
下明仲

胡致堂說道理無人及得他以他才氣甚麼事做不得只是不通檢點如何做得事成我欲做事事未起而人已檢點我矣

胡致堂議論英發人物偉然向嘗侍之坐見其數盃後歌孔明出師表誦張才叔自靖人自獻于先王義陳

了翁奏狀等可謂豪傑之士也讀史管見乃嶺表所作當時並無一冊文字隨行只是記憶所以其間有抵牾處有人好誦佛書致堂因集史傳中譯音姓名揭之一處其人果收去念誦此其戲也又嘗解論語舉直錯諸枉章云是時哀公威權已去不知何以爲舉錯但能以是權付之孔子斯可矣

人傑

胡氏管見有可刪者

慕容超說昭帝說○備

南軒言胡明仲有三大功一言太上即尊位事二行三

年喪三云云先生云南軒見得好設使不即位只以  
大元帥討賊徽廟升遐率六軍縞素是甚麼模樣氣  
勢後來一番難如一番今日有人做亦得只是又較  
難些子揚

胡藉溪人物好沈靜謹嚴只是講學不透

賀孫○以  
下原仲

藉溪教諸生於功課餘暇以片紙書古人懿行或詩文  
銘贊之有補於人者粘置壁間俾往來誦之咸令精

熟若海

籍溪廳上大榜曰文定書堂籍溪舊開藥店胡居士熟

藥正鋪并諸藥牌猶存

振

明仲甚畏仁仲議論明仲亦自信不及先生云人不可

不遇敵已之人仁仲當時無有能當之者故恣其言

說出來然今觀明仲說較平正

揚○以  
下仁仲

游楊之後多爲秦相所屈胡文定剛勁諸子皆然和仲

不屈於秦仁仲直却其招不往

揚

仁仲見龜山求教龜山云且讀論語問以何爲要云熟

讀方

五峯善思然思過處亦有之

道夫

知言形容道德只是如畫卦影

到了後方理會得何益○方

東萊云知言勝似正蒙先生曰蓋後出者巧也

方子○根錄云

正蒙規模  
大知言小

知言疑議大端有八性無善惡心爲已發仁以用言心  
以用盡不事涵養先務知識氣象迫狹語論過高

方

做出那事便是這裏有那理凡天地生出那物便都是

那裏有那理五峯謂性立天下之有說得好情効天

下之動効如効死効力之効是自力行出也

淳

五峰說心妙性情之德不是他曾去研窮深體如何直

見得恁地

夔孫

心妙性情之德妙是主宰運用之意

升卿

仲思問五峰中誠仁如何曰中者性之道言未發也誠者命之道言實理也仁者心之道言發動之端也又疑道字可改爲德字曰亦可德字較緊然他是特地

下此寬字伊川答與叔中書亦云中者性之德近之  
伯恭云知言勝正蒙似此等處誠然但不能純如此  
處爾又疑中誠仁一而已何必別言曰理固未嘗不  
同但聖賢說一箇物事時且隨處說他那一箇意思  
自是他一箇字中便有箇正意義如此不可混說聖  
賢書初便不用許多學者亦宜各隨他說處看之  
方見得他所說字本相如誠如  
中仁若便只混看則下梢  
都看不出

伯羽○砥  
錄別出

仲思問天之所以命乎人者實理而已故言誠者命之道中者性之道如何曰未發時便是性曰如此則喜怒哀樂未發便是性既發便是情曰然此三句道得極密伯恭道知言勝似正蒙如這處也是密但不純恁地又問道字不如德字曰所以程子云中者性之德爲近之但言其自然則謂之道言其實體則謂之德德字較緊道字較寬但他故下這寬字不要挾拶著他又問言中則誠與仁亦在其內否曰不可如此

看若可混併則聖賢已自混併了須逐句看他言誠時便主在實理發育流行處言性時便主在寂然不動處言心時便主在生發處

砥

堯卿問誠者性之德此語如何曰何者不是性之德如仁義禮智皆性之德恁地說較不切不如胡氏誠者命之道乎說得較近傍

義剛

問誠者物之終始而命之道曰誠是實理徹上徹下只是這箇生物都從那上做來萬物流形天地之間都

是那底做五峯云誠者命之道中者性之道仁者心  
之道此數句說得密如何大本處却含糊了以性爲  
無善惡天理人欲都混了故把作同體或問同行語  
如何曰此却是只就事言之直卿曰它既以性無善  
惡何故云中者性之道曰它也把中做無善惡

李維申說合於心者爲仁曰却是從義上去不如前日  
說存得此心便是仁却是因舉五峰語云人有不仁  
心無不仁說得極好知

胡五峰云人有不仁心無不仁此說極好人有私欲遮  
障了不見這仁然心中仁依舊只在如日月本自光  
明雖被雲遮光明依舊在裏又如水被泥土塞了所  
以不流然水性之流依舊只在所以克己復禮爲仁  
只是克了私欲仁依舊只在那裏譬如一箇鏡本自  
光明只緣塵都昏了若磨去塵光明只在明作

五峰曰人有不仁心無不仁既心無不仁則巧言令色  
者是心不是如巧言令色則不成說道巧言令色底

不是心別有一人巧言令色如心無不仁則孔子何以說回也其心三月不違仁蕭佐曰我欲仁斯仁至矣這箇便是心無不仁曰回心三月不違仁如何說問者默然久之先生曰既說回心三月不違仁則心有違仁底違仁底是心不是說我欲仁便有不欲仁底是心不是節

五峰謂人有不仁心無不仁此語有病且如顏子其心三月不違仁若纔違仁其心便不仁矣豈可謂心無

不仁定夫云恐是五峰說本心無不仁曰亦未是譬  
如人今日貧則說昔日富不得

震

伊川初嘗曰凡言心者皆指已發而言後復曰此說未  
當五峰却守其前說以心爲已發性爲未發將心性  
二字對說知言中如此處甚多

審

人學當勉不可據見定蓋道理無窮人之思慮有限若  
只守所得以爲主則其或墮於偏者不復能自明也  
如五峰只就其上成就所學亦只是忽而不詳細反

復也

方

問知言有云佛家窺見天機有不器於物者此語莫已作兩截曰亦無甚病

方錄作此語甚得之

此蓋指妙萬物者而

不知萬物皆在其中聖人見道體正如對面見人其

耳目口鼻髮眉無不見佛家如遠望人只見髮象初

不知其人作何形狀問佛家既如此說而其說性乃

指氣却是兩般曰渠初不離此說但既差了則自然

錯入別處去

可學

因言久不得胡季隨諸人書季隨主其家學說性不可以善言本然之善本自無對才說善時便與那惡對矣才說善惡便非必然之性矣必然之性是上面一箇其尊無比此文定  
之說某嘗辨之云本然之性固渾然如佛言善哉此文定  
之說某嘗辨之云本然之性固渾然至善不與惡對此文定  
之說此天之賦予我者然也然

行之在人則有善有惡做得是者爲善做得不是者爲惡豈可謂善者非本然之性只是行於人者有二者之異然行得善者便是那本然之性也若如其言有本然之善偏錄作性又有善惡相對之善偏錄作性則是有二性矣方其得於天者此性也及其行得善者亦此性也只是纔有箇善底偏錄作行得善底便有箇不善底所以善惡須著對說不是元有箇惡在那裏等得他來與之爲對只是行得錯底便流入於惡矣此文定之

說故其子孫皆主其說而致堂五峰以來其說益差  
遂成有兩性本然者是一性善惡相對者又是一性  
他只說本然者是性善惡相對者不是性豈有此理  
然文定又得於龜山龜山得之東林常摠摠龜山鄉  
人與之往來後住廬山東林龜山赴省又往見之摠  
極聰明深通佛書有道行龜山問孟子道性善說得  
是否摠曰是又問性豈可以善惡言摠曰本然之性  
不與惡對此語流傳自他然摠之言本亦未有病蓋

本然之性是本無惡及至文定遂以性善爲贊嘆之辭到得致堂五峰輩遂分成兩截說善底不是性若善底非本然之性却那處得這善來既曰贊嘆性好之辭便是性矣性本善矣

謂錄作便是若非性善何贊嘆之有

如佛言善哉善哉爲贊美之辭亦是說這箇道好所以贊嘆之也二蘇論性亦是如此嘗言孟子道性善猶云火之能熟物也荀卿言性惡猶云火之能焚物也龜山反其說而辨之曰火之所以能熟物者以其

能焚故耳若火不能焚物何從熟蘇氏論性說自從古聖人以來至孔子不得已而命之曰一寄之曰中未嘗分善惡言也自孟子道性善而一與中始支矣盡是胡說他更不看道理只認我說得行底便是諸胡之說亦然季隨至今守其家說因問文定却是卓然有立所謂非文王猶興者曰固是他資質好在太學中也多聞先生師友之訓所以能然嘗得穎昌一士人忘其姓名問學多得此人敬言發後爲荆門教授

龜山與之爲代因此識龜山因龜山方識游謝不及  
識伊川自荆門入爲國子博士出來便爲湖北提舉  
是時上蔡宰本路一邑文定却從龜山求書見上蔡  
既到湖北遂遣人送書與上蔡上蔡既受書文定乃  
往見之入境人皆訝知縣不接監司論理上蔡既受  
他書也是難爲出來接他既入縣遂先修後進禮見  
之畢竟文定之學後來得於上蔡者爲多他所以尊  
上蔡而不甚滿於游楊二公看來游定夫後來也是

郎當誠有不滿人意處頃嘗見定夫集極說得醜差  
盡背其師說更說伊川之學不如他之所得所以五

峰臨終謂彪德美曰聖門工夫要處只在箇敬字游  
定夫所以卒爲程門之罪人者以其不仁不敬故也

誠如其言

卓○綱  
錄畧

胡氏說善是贊美之辭其源却自龜山龜山語錄可見  
胡氏以此錯了故所作知言並一齊恁地說本欲推  
高反低了蓋說高無形影其勢遂向下去前日說韓

子云何謂性仁義禮智信此語自是却是他已見大  
意但下面便說差了荀子但只見氣之不好而不知  
理之皆善揚子是好許多思量安排方要把孟子性  
善之說爲是又有不善之人方要把荀子性惡之說  
爲是又自有好人故說道善惡混溫公便主張揚子  
而非孟子程先生發明出來自今觀之可謂盡矣

賀孫

龜山往來大學過廬山見常摠摠亦南劍人與龜山論  
性謂本然之善不與惡對後胡文定得其說於龜山

至今諸胡謂本然之善不與惡對與惡爲對者又別有一善常總之言初未爲失若論本然之性只一味是善安得惡來人自去壞了便是惡既有惡便與善爲對今他却說有不與惡對底善又有與惡對底善如近年郭子和九圖便是如此見識上面書一圈子寫性善字從此牽下兩邊有善有惡或云恐文定當來未甚有差後來傳襲節次訛舛曰看他說善者贊美之詞不與惡對已自差異

文蔚

問性無善惡之說從何而始曰此出於常摠摠住廬山  
龜山入京枉道見之留數日因問孟子識性否曰識  
曰何以言之曰善不與惡對言他之意乃是謂其初  
只有善未有惡其後文定得之龜山遂差了今湖南  
學者信重知言某嘗爲敬夫辨析甚諱之渠當初唱  
道湖南偶無人能與辨論者可惜可惜又讀至彪居  
正問心一段先生曰如何可學謂不於原本處理會  
却待些子發見曰孟子此事乃是一時間爲齊王耳

今乃欲引之以上他入之身便不是了良久又云以放心求心便不是纔知求心便已回矣安得謂之放

可學

因論湖湘學者崇尚知言曰知言固有好處然亦大有差失如論性却曰不可以善惡辨不可以是非分既無善惡又無是非則是告子湍水之說爾如曰好惡性也君子好惡以道小人好惡以欲則是以好惡說性而道在性外矣不知此理却從何而出問所謂探

視聽言動無息之際可以會情此猶告子生之謂性  
之意否曰此語亦有病下文謂道義明著孰知其爲  
此心物欲引誘孰知其爲人欲便以道義對物欲却  
是性中本無道義逐旋於此處攏入兩端則是性亦  
可以不善言矣如曰性也者天地鬼神之奧也善不  
足以名之况惡乎孟子說性善云者嘆美之辭不與  
惡對其所謂天地鬼神之奧言語亦大故誇逞某嘗  
謂聖賢言語自是平易如孟子尚自有此險處孔子

則直是平實不與惡對之說本是龜山與摠老相遇因論孟子說性曾有此言文定往往得之龜山故有是言然摠老當時之語猶曰渾然至善不與惡對猶未甚失性善之意今去其渾然至善之語而獨以不與惡對爲歎美之辭則其失遠矣如論齊王愛牛此良心之苗裔因私欲而見者以答求放心之間然雞犬之放則固有去而不可收之理人之放心只知求之則良心在此矣何必等待天理發見於物欲之間

然後求之如此則中間空闕多少去處正如屋下失物直待去城外求也愛牛之事孟子只就齊王身上說若施之他人則不可況操存涵養皆是平日工夫豈有等待發見然後操存之理今胡氏子弟議論每每好高要不在人下纔說心便不說用心以爲心不可用至如易傳中有連使用心字處皆塗去用字某以爲孟子所謂堯舜之治天下豈無所用其心哉何獨不可以言也季隨不以爲然遂檢文定春秋中

有連使用心字處質之方無語大率議論文字須要親切如伊川說顏子樂道爲不識顏子者蓋因問者元不曾親切尋究故就其人而答欲其深思而自得之爾後人多因程子之言愈見說得高遠如是則又不若樂道之爲有據伊尹樂堯舜之道亦果非樂道乎湖湘此等氣象乃其素習無怪今日之尤甚也

謨

五峰知言大抵說性未是自胡文定胡侍郎皆說性未是其言曰性猶水也善其水之下乎情其水之濶乎

欲其水之波浪乎乍看似亦好細看不然如瀾與波  
浪何別渠又包了情欲在性中所以其說如此又云  
性好惡也君子以道小人以欲君子小人天理人欲  
而已矣伯恭舊看知言云只有兩段好其餘都不好  
一段能攻人實病能受人實攻一段以天下與人而  
無人德我之望有人之天下而無取人之嫌後來却  
又云都好不知伯恭晚年是如何地看某舊作孟子  
或問云人說性不肯定說是性善只是欲推尊性於

性之上虛立一箇善字位子推尊其性耳不知尊之反所以失之

璘

五峰云好惡性也此說未是胡氏兄弟既闢釋氏却說性無善惡便似說得空了却近釋氏但當云好善而惡惡性也當謂好惡情也曰只是好惡却好惡箇甚底伯豐謂只君子好惡以道亦未穩曰如此道却在外旋好惡之也

當

直卿言五峰說性云好惡性也本是要說得高不知却

反說得低了曰依舊是氣質上說某常要與他改云  
所以好惡者性也

寓

好惡性也既有好即具善有惡即具惡若只云有好惡  
而善惡不定於其中則是性中理不定也既曰天便  
有天命天討

方

知言云凡人之生粹然天地之心道義全具無適無莫  
不可以善惡辨不可以是非分無過也無不及也此  
中之所以名也即告子性無善無不善之論也唯伊

川性即理也一句甚切至

閻祖

問知言萬事萬物性之質也如何曰此句亦未有害最是好惡性也大錯既以好惡爲性下文却云君子好惡以道則是道乃旋安排入來推此其餘皆可見問與告子說話莫同否曰便是湍水之說又問粹然完具云云却說得好又云不可以善惡言不可以是非判曰渠說有二錯一是把性作無頭面物事二是云

失記。  
可學。

五峰言天命不囿於善不可以人欲對曰天理固無對  
然有人欲則天理便不得不與人欲對爲消長善亦  
本無對然既有惡則善便不得不與惡對爲盛衰且  
謂天命不囿於物可也謂不囿於善則不知天之所  
以爲天矣謂惡不足以言性可也謂善不足以言性  
則不知善之所從來矣

升卿

好善而惡惡人之性也爲有善惡故有好惡善惡字重  
好惡字輕君子順其性小人拂其性五峰言好惡性

也君子好惡以道小人好惡以欲是好人之所惡惡人之所好亦是性也而可乎或問天理人欲同體異用之說如何曰當然之理人合恁地底便是體故仁義禮智爲體如五峰之說則仁與不仁義與不義禮與無禮智與無智皆是性如此則性乃一箇大人欲窠子其說乃與東坡子由相似是大鑿脫非小失也

同行異情一句却說得去

方子

或問天理人欲同體而異用同行而異情曰胡氏之病

在於說性無善惡體中只有天理無人欲謂之同體  
則非也同行異情蓋亦有之如口之於味目之於色  
耳之於聲鼻之於臭四肢之於安佚聖人與常人皆  
如此是同行也然聖人之情不溺於此所以與常人  
異耳人傑謂聖賢不視惡色不聽惡聲此則非同行  
者曰彼亦就其同行處說耳某謂聖賢立言處處皆  
通必不若胡氏之偏也龜山云天命之謂性人欲非  
性也胡氏不取其說是以人欲爲性矣此其甚差者

也人傑

問天理人欲同體而異用同行而異情如何曰下句尚可上句有病蓋行處容或可同而其情則本不同也至於體用豈可言異觀天理人欲所以不同者其本原元自不同何待用也胡氏之學大率於大本處看不分曉故銳於闢異端而不免自入一脚也如說性便說性本無善惡發然後有善惡孟子說性善自是嘆美之辭不與惡爲對大本處不分曉故所發皆差

蓋其說始因龜山問摠老而答曰善則本然不與惡對言本然猶可今曰嘆美之辭則大故差了又一學者問以放心求放心如何他當時問得極緊他一向鶻突應將去大抵心只操則存捨則放了俄頃之間更不喫力他却說得如此周遮

大雅

問天理人欲同行而異情胡氏此語已精若所謂同體而異用則失之混而無別否曰胡氏論性無善惡此句便是從這裏來本原處無分別都把做一般所以

便謂之同體他看道理儘精微不知如何只一箇大本却無別了

淳

或問天理人欲同體異用曰如何天理人欲同體得如此却是性可以爲善亦可以爲惡却是一團人欲窠子將甚麼做體却是韓愈說性自好言人之爲性有五仁義禮智信是也指此五者爲性却說得是性只是一箇至善道理萬善總名才有一毫不善自是情之流放處如何却與人欲同體今人全不去看

謙

問天理人欲同體而異用先生以爲未穩是否曰亦須  
是實見此句可疑始得又曰今人於義利處皆無辨  
直恁鶻突去是須還他是不是還他不是若都做得  
是猶自有箇淺深自如此說必有一箇不是處今則  
都無理會矣

寓

何丞辨五峰理性何異脩性蓋五峰以性爲非善惡乃  
是一空物故云理也

方

看知言彪居正問仁一段云極費力有大路不行只行

小徑至如操而存之等語當是在先自孟子亦不專以此爲學者入德之門也且齊王人欲蔽固故指其可取者言之至如說自牖開說亦是爲蔽固而言若吾儕言語是是非非亦何須如此而五峰專言之則偏也又云居正問以放心求放心可乎既知其放又知求之則此便是良心也又何求乎又何必俟其良心遇事發見而後操之乎

方

五峰曾說如齊宣王不忍觳觫之心乃良心當存此心

敬夫說觀過知仁當察過心則知仁二說皆好意思  
然却是尋良心與過心也不消得只此心常明不爲  
物蔽物來自見

從周

五峰作皇王大紀說北極如帝星紫微等皆不動說宮  
聲屬仁不知宮聲却屬信又宮無定體十二律旋相  
爲宮帝星等如果不動則天必擘破不知何故讀書  
如此不子細

人傑

五峰說得宮之用極大殊不知十二律皆有宮又宮在

五行屬土他說得其用如此大猶五常之仁宮自屬  
土亦不爲仁也又其云天有五帝座星皆不動今天  
之不動者只有紫微垣北極五帝座不動其他帝座  
如天市垣太微垣大火中星帝座與大角星帝座皆  
隨天動安得謂不動

卓

五峰論樂以黃鍾爲仁都配屬得不是它此等上不曾  
理會却都要將一大話包了

當

論五峰說極星有三箇極星不動殊不可曉若以天運

譬如輪盤則極星只是中間帶子處所以不動若是三箇不動則不可轉矣又言雖形器之事若未見得盡亦不可輕立議論須是做下學工夫雖天文地理亦須看得他破方可議之又曰明仲嘗畏五峰議論精確五峰亦嘗不有其兄嘗欲焚其論語解并讀史管見以今觀之殊不然如論語管見中雖有粗處亦多明白至五峰議論反似好高之過得一說便說其實與這物事都不相干涉便說得無著落五峰辨疑

孟之說周遮全不分曉若是恁地分疏孟子剗地沈淪不能得出世

嘆

五峰疾病彪德美問之且求教焉五峰曰游定夫先生所以得罪於程氏之門者以其不仁不敬而已先生云言其習不著行不察悠悠地至於無所得而歸釋氏也其子德華謂汪聖錫云定夫於程氏無所得後見某長老乃有得也此與呂居仁雜記語同大率其資質本好者却不用力所以悠悠如上蔡文定器質

本駁偏所以用力尤多方

五峰有本亭記甚好理固是好其文章排佈之類是文人之文此其所居也其所極好在嶽山下當時託二學生謀得之文定本居籍溪恐其當衝世亂或不免遂去居湖北侯師聖令其遷謂亂將作乃遷衡嶽山下亦有一人俟令其遷不從後不免文定以識時知

幾薦侯

亂兵謂宗汝霖所招勸王者宗死其兵散走爲亂湖北靡子遺矣○楊

五峰說區以別矣用禮記勾萌字音林少穎亦曾說與

黃祖舜來如此

方

胡氏議論須捉一事爲說如后妃幽閒貞淑却只指不  
妬忌爲至伯夷氣象如此却只指不失初心爲就文  
王去武王之事大要不論體只論發出來處類如此  
也

胡說有三箇物事一不動一動一靜相對

振

問湖南以身格物則先亦是行但不把行做事爾曰湖  
南病正在無涵養無涵養所以尋常盡發出來

不留在家

方○

因說湖南學先體察云不知古人是先學灑掃應對爲復先體察方

湖南一派譬如燈火要明只管挑不添油便明得也即不好所以氣局小長汲汲然張筋努脉方

謂胡季隨曰文定五峰之學以今切議來只有太過無不及季隨而今却但有不及又曰爲學要剛毅果決

悠悠不濟事

方子○林學叢錄云爲學要剛毅果決悠悠不濟事且如發憤忘食樂以忘憂

是甚麼樣精神骨肋  
註云因說胡季隨

或說胡季隨才敏曰也不濟事須是確實有志而才敏

方可若小小聰悟亦徒然

學業

五峰諸子不著心看文字恃其明敏都不虛心下意便  
要做大某嘗語學者難得信得及就實上做工夫底

人

賀孫

朱子語類卷一百一

欽定四庫全書

子部

朱子語類卷一百二至四

欽定四庫全書

詳校官中書臣程 炎

刑部郎中臣許兆椿覆勘

總校官中書臣朱 錦

校對官學正臣李 巍

謄錄舉人臣李元位

謄錄監生臣李如梓

欽定四庫全書

朱子語類卷一百一

楊氏門人

羅仲素

羅先生嚴毅清苦殊可畏道夫

李先生言羅仲素春秋說不及文定蓋文定才大設張

羅落者大

文定集有答羅  
書可見○方

道夫言羅先生教學者靜坐中看喜怒哀樂未發謂之

中未發作何氣象李先生以爲此意不惟於進學有  
力兼亦是養心之要而遺書有云既思則是已發昔  
嘗疑其與前所舉有礙細思亦甚緊要不可以不攷  
直卿曰此問亦甚切但程先生剖析毫釐體用明白  
羅先生探索本源洞見道體二者皆有大功於世善  
觀之則亦並行而不相悖矣况羅先生於靜坐觀之  
乃其思慮未萌虛靈不昧自有以見其氣象則初無  
害於未發蘇季明以求字爲問則求非思慮不可此

伊川所以力辨其差也先生曰公雖是如此分解羅  
先生說終恐做病如明道亦說靜坐可以爲學謝上  
蔡亦言多著靜不妨此說終是小偏才偏便做病道  
理自有動時自有靜時學者只是敬以直內義以方  
外見得世間無處不是道理雖至微至小處亦有道  
理便以道理處之不可專要去靜處求所以伊川謂  
只用敬不用靜便說得平也是他經歷多故見得恁  
地正而不偏若以世之大段紛擾人觀之若會靜得

固好若講學則不可有毫髮之偏也如天雄附子冷  
底人喫得也好如要通天下喫便不可道夫

蕭子莊

先生問浦城有蕭先生頴受業於龜山之門不知所得  
如何道夫遂以蕭先生所答范公三書呈先生曰元  
來是箇天資自好朴實頭底人初非學問之力且如  
所謂人能弘道君子泰而不驕君子坦蕩蕩三者那  
人舉得本自不倫他又却從而贊美之也須思量道

如何而能弘如何而能泰與坦蕩蕩却只恁說教人  
從何處下手况人能弘道本非此意如他所說却是  
士不可以不弘毅執德不弘今却以人能弘道言之  
自不干事又如第二書言士之所志舍仁義而何爲  
哉惟仁必欲熟義必欲精仁熟則造次顛沛有所不  
違義精則利用安身而德崇矣此數句說得儘好但  
仁固欲熟義固欲精也須道如何而能精如何而能  
熟却只隨他在後面說不知前面畢竟是如何又如

舉孟子不動心養氣之說皆是汎說惟其如此故人亦謂伊川也只恁地所以豪傑之士皆傲睨不服又曰據公所見若有人問自家仁必欲熟義必欲精兩句如何地答這便是格物致知道夫曰莫是克去己私以明天理則仁自然熟義自然精曰此正程先生所謂涵養必以敬進學在致知之意也道夫

廖用中

或問爲善爲利處因舉龜山答廖用中書云龜山說得

鶻突用中認得不子細後來於利害便不能分別紹興間秦老當國方主和議廖有召命自無所見却去扣其平日所友善之人鄭邦達邦達初不經意但言和亦是好事廖到闕即助和議遂爲中丞幸而不肯爲秦鷹犬秦嘗諷其論趙丞相不從遷工部尚書迄以此去儒用

龜山與廖尚書說義利事廖云義利即是天理人欲龜山曰只怕賢錯認以利爲義也後來被召主和議果

如龜山說廖初舉鄭厚與某人可見其賢此二人二人皆要

上恐脫不字

主和議及廖被召却不問此二人却

去與葉孝先商量更輔之以主和及爲中丞又薦鄭轂然廖終與秦不合而出但初不能別義利之分亦是平時講之不熟也鄭博士某舊及見之年七十餘云嘗見上蔡先人甚敬之

賀孫

因言廖用中議和事云廖用中固非詭隨者但見道理不曾分曉當時龜山已嘗有語云恐予以利爲義者

政爲是也

壽昌

胡德輝

因說胡珵德輝所著文字問德輝何如人曰先友也晉  
陵人曾從龜山游故所記多龜山說話能詩文墨隸  
皆精好嘗見先人館中唱和一卷唯胡詩特佳趙忠  
簡公當國與張嵲巨山同爲史官及趙公去位張魏  
公獨相以爲元祐未必全是熙豐未必全非遂擢何  
倫仲李似表二人爲史官胡張所脩史皆標出欲改

之胡張遂求去及忠簡再入相遂去何李依舊用胡  
張爲史官成書奏上美得都成私意

儒用

尹氏門人

王德脩

先生云嚮日鄉間一親戚虞氏見仙里王德脩見教云  
學者要識一愧字與耻字此言却極好

大雅

一日侍坐學者問難紛然王德脩曰不必多問但去行  
取且如人理會惟精惟一允執厥中只管說如此是

精如此是一臨了中却  
不見先生曰精一則中矣

蔚文

朱子語類卷一百二

欽定四庫全書

朱子語類卷一百三

羅氏門人

李應中

李先生終日危坐而神彩精明略無隕墮之氣

升卿

延平先生氣象好

振

問延平先生言行曰他却不曾著書充養得極好凡爲學也不過是恁地涵養將去初無異義只是先生醉

面盜背自然不可及

驥

李延平初間也是豪邁底人到後來也是磨琢之功在鄉若不異於常人鄉曲以上底人只道他是箇善人他也畧不與人說待問了方與說

賀孫

李先生少年豪勇夜醉馳馬數里而歸後來養成徐緩雖行二三里路常委蛇緩步如從容室中也問先生如何養曰先生只是潛養思索

方

人性乍急發不中節者當於平日言語動作間以緩持

之持之久則心中所發自有條理因說李先生行郊外緩步委蛇如在室中不計其遠嘗隨至人家才相見便都看了壁上碑文先生俟茶罷即起向壁立看看了一廳碑又移步向次壁看看畢就坐其所持專一詳緩如此初性甚急後來養成至於是也

方

行夫問李先生謂常存此心勿爲事物所勝先生答之云云頃之復曰李先生涵養得自是別真所謂不爲事物所勝者古人云終日無疾言遽色他真箇是如

此如尋常人去近處必徐行出遠處行必稍急先生  
出近處也如此出遠處亦只如此尋常人叫一人叫  
之一二聲不至則聲必厲先生叫之不至聲不加於  
前也又如坐處僻間有字某每常亦須起頭一看若  
先生則不然方其坐時固不看也若是欲看則必起  
就僻下視之其不爲事物所勝大率若此常聞先生  
後生時極豪邁一飲必數十盃醉則好馳馬一驟三  
二十里不回後來却收拾得恁地純粹所以難及夫道

李先生居處有常不作費力事所居狹隘屋宇卑小及子弟漸長逐間接起又接起廳屋亦有小書室然甚齊整瀟灑安物皆有常處其制行不異於人亦嘗爲任希純教授延入學作職事居常無甚異同頽如也真得龜山法門亦嘗議龜山之失方

李延平不著書不作文頽然若一田夫野老然又太和順了羅仲素衣服之類亦日有定程如黃昏如何服睡復易然太執

李先生好看論語自明而已謂孟子早是說得好了使人愛看了也其居在山間亦殊無文字看讀辨正更愛看春秋左氏初學于仲索只看經後侯師聖來沙縣羅邀之至問伊川如何看云亦看左氏要見曲折故始看左氏方

或問近見廖子晦言今年見先生問延平先生靜坐之說先生頗不以爲然不知如何曰這事難說靜坐理會道理自不妨只是討要靜坐則不可理會得道理

明透自然是靜今人都是討靜坐以省事則不可嘗見李先生說舊見羅先生說春秋頗覺不甚好不知到羅浮靜極後又理會得如何是時羅已死某心常疑之

以今觀之是如此蓋心下熱鬧如何看得道理出須是靜方看得出所謂靜坐只是打疊得心下無事則道理始出道理既出則心下愈明靜矣謂

舊見李先生云初問羅先生學春秋覺得自好後看胡文定春秋方知其說有未安處又云不知後來到

羅浮山中靜極後見得又如何某頗疑此說以爲春秋與靜字不相干何故須是靜處方得工夫長進後來方覺得這話好蓋義理自有著力看不出處然此亦是後面事初間亦須用力去理會始得若只靠著靜後聽他自長進便却不得然爲學自有許多階級不可不知也如某許多文字便覺得有箇喫力處尚有這些病在若還更得數年不知又如何

幹

李先生云看聖賢言語但一踔看過便見道理者却是

真意思纔著心去看便蹉過了多

升卿

正蒙知言之類學者更須被他汨沒李先生極不要人傳寫文字及看此等舊嘗看正蒙李甚不許然李終是短於辨論邪正蓋皆不可無也無之即是少博學詳說工夫也

方

李先生云橫渠說不須看非是不是只是恐先入了費力

方

李問陳幾叟借得文定傳本用薄紙真謹寫一部易傳

亦然

方

李先生云書不要點看得更好

方

李先生說一步是一步如說仁者其言也訥某當時爲之語云聖人如天覆萬物

云云

李曰不要如是廣說

須窮其言也訥前頭如何要得一進步處

方

李先生不要人强行須有見得處方行所謂灑然處然猶有偏在灑落而行固好未到灑落處不成不行亦須按本行之待其著察

方

李先生當時說學已有許多意思只爲說敬字不分明  
所以許多時無捉摸處

方

李先生說人心中大段惡念却易制伏最是那不大段  
計利害乍往乍來底念慮相續不斷難爲驅除今看  
得來是如此

廣

李先生嘗云人之念慮若是於顯然過惡萌動此却易  
見易除却怕於相似閑底事爆起來纏繞思念將去  
不能除此尤害事某向來亦是如此

賀孫

必有事焉由此可至君子三變改過遷善由此可至所

過者化李先生說

方

李先生言事雖紛紛須還我處置

方

李先生有爲只用蠱卦但有決裂處

方

李先生云天下事道理多如子瞻才智高亦或窺得然其得處便有病也

方

問先生所作李先生行狀云終日危坐以驗夫喜怒哀樂之前氣象爲如何而求所謂中者與伊川之說若

不相似曰這處是舊日下得語太重今以伊川之語  
格之則其下工夫處亦是有些子偏只是被李先生  
靜得極了便自見得是有箇覺處不似別人今終日

危坐只是且收斂在此勝如奔馳若一向如此又似

坐禪入定

賀孫

或問延平先生何故驗於喜怒哀樂未發之前而求所  
謂中曰只是要見氣象陳後之曰持守良久亦可見  
未發氣象曰延平即是此意若一向這裏又差從釋

氏去淳

問延平欲於未發之前觀其氣象此與楊氏體驗於未發之前者異同如何曰這箇亦有些病那體驗字是有箇思量了便是已發若觀時恁著意看便也是已發問此體驗是著意觀只恁平常否曰此亦是以不觀觀之淳

再論李先生之學常在目前先生曰只是君子戒謹所不睹恐懼所不聞便自然常存顏子非禮勿視聽言

動正是如此

德明

胡氏門人

張敬夫

近日南軒書來不曾見說嘗讀某書有何新得今又與  
伯恭相聚往往打入多中去也

方

欽夫見識極高却不耐事伯恭學耐事却有病

升卿

南軒伯恭之學皆踈畧南軒踈畧從高處去伯恭踈畧  
從卑處去伯恭說道理與作爲自是兩件事如云仁

義道德與度數刑政介然爲兩塗不可相通他在時  
不曾見與某說他死後諸門人弟子此等議論方漸  
漸說出來乃云皆原於伯恭也

偶

欽夫說得高了故先生只要得典實平易

方

敬夫高明他將謂人都似他纔一說時便更不問人曉  
會與否且要說盡他箇故他門人敏底祇學得他說  
話若資質不逮依舊無著摸某則性鈍讀書極是辛  
苦故尋常與人言多不敢爲高遠之論蓋爲是身曾

親經歷遇故不敢以是責人爾學記曰進而不顧其  
安使人不由其誠今教者之病多是如此

道夫

學者於理有未至處切不可輕易與之說張敬夫爲人  
明快每與學者說話一切傾倒說出此非不可但學  
者見未到這裏見他如此說便不復致思亦甚害事  
某則不然非是不與他說蓋不欲與學者以未至之  
理耳

析

南軒嘗言遁問工夫好做振

南軒說端倪兩字極好此兩字却自人欲中生出來人  
若無這些箇秉彝如何思量得要 做好人

輝

或問南軒云行之至則知益明知既明則行益至此意  
如何曰道理固是如此學者工夫當並進不可推泥  
牽連下梢成兩下擔閣然二者都要用正則成就時  
二者自相資益矣

銖

王壬問南軒類聚言仁處先生何故不欲其如此曰便  
是工夫不可恁地如此則氣象促迫不好聖人說仁

處固是緊要不成不說仁處皆無用亦須是從近看  
將去優柔玩味久之自有一箇會處方是工夫如博  
學審問慎思明辨篤行聖人須說博學如何不教人  
便從謹獨處做須是說禮儀三百威儀三千始得雜

問先生舊與南軒反覆論仁後來畢竟合否曰亦有一  
二處未合敬夫說本出胡氏胡氏之說惟敬夫獨得  
之其餘門人皆不曉但云當守師之說向來往長沙  
正與敬夫辨此可學

問南軒與先生書說性善者嘆美之辭如何曰不必如此說善只是自然純粹之理今人多以善與惡對說便不是大凡人何嘗不願爲好人而怕惡人

輝

問南軒謂動中見靜方識此心如何是動中見靜曰動中見靜便是程子所說艮止之意釋氏便言定聖人只言止

寓錄云此段文已詳了

敬夫却要將這箇爲見天地之心復是靜中見動他又要動中見靜却倒說了

淳○寓同

問曾看南軒論語否曰雖嘗畧看未之熟也曰南軒後

來只脩得此書如孟子竟無工夫改

必大

南軒論語初成書時先見後十篇一切寫去與他說後見前十篇又寫去後得書來謂說得是都改了孟子說不曾商量

問南軒解子謂子產有君子之道四焉將孟子患而不知爲政立兩辭辯論非特於本旨爲贅且使學者又生出一事曰欽夫最不可得聽人說話便肯改如論語舊說某與議論修來多是此類且如他向解顏淵

克己復禮處須說要先格物然後克己某與說克己一事自始學至成德若未至從心所欲不踰矩從容中道時皆要克豈可與如此說定因作一戲語云譬如對先生長者聽其格言至論却嫌他說得未盡云我更與他添些令盡彼當時聞此語即相從除却先要格物一段不意今又添出自始學至成德皆要克一段此是某攻他病底藥病去則藥自不用可也今又更留取藥在却是去得一病又留取一病在又如

述而不作處他元說先云彼老彭者何人哉而反使  
吾夫子想像慕用某與說此譬如吾夫子前面致恭  
盡禮于人而吾輩乃奮怒攘臂於其後他聞說即改  
此類甚衆若孟子則未經修爲人傳去印了彼亦自  
悔出仕後不曾看得文字未及修孟子而卒蓋其間  
有大段害事者如論性善處却著一片說入太極來  
此類頗多大雅云此書却好把與一般頹闊者看以  
作其喜學之意曰此亦呂伯恭教人看上蔡語錄之

意但既與他看了候他稍知趨嚮便與醫了則得

雅大

南軒語孟子嘗說他這文字好看蓋解經不必做文字止合解釋得文字通則理自明意自足今多去上做文字少間說來說去只說得自己一片道理經意却蹉過了要之經之於理亦猶傳之於經傳所以解經也既通其經則傳亦可無經所以明理也若曉得理則經雖無亦可嘗見一僧云今人解書如一盞酒本自好被這一人來添些水那一人來又添些水次

第添來添去都淡了他禪家儘見得這樣只是他又  
忒無註解問陸氏之學恐將來亦無註解去曰他本  
只是禪幹問嘗看文字多是虛字上無緊要處最有  
道理若做文粗疎粗解這般意思却恐都不見了曰  
然且如今說秉彝這箇道理却在彝字上秉字下所  
以莊子謂批大郤導大窾便是道理都在空處如易  
中說觀其會通以行其典禮通便是空處行得去便  
是通會便是四邊合湊來處問莊子云聞解牛得養

生如何可以養生曰只是順他道理去不假思慮不去傷著他便可以養生又曰不見全牛只是見得骨骼自開問莊子此意如何曰也是他見得箇道理如此問他本是絕滅道理如何有所見曰他也是就他道理中見得如此因嘆曰天下道理各見得恁地剖析開去多少快活若只鶻突在裏是自欺而已又問老子云三十幅共一轂有之以爲利無之以爲用亦是此意否曰某也政謂與此一般便也是他看得到

這裏

幹

林艾軒在行在一日訪南軒曰程先生語錄某却看得易傳看不得南軒曰何故林曰易有象數伊川皆不言何也南軒曰孔子說易不然易曰公用射隼於高墉之上獲之無不利如以象言則公是甚射是甚隼是甚高墉是甚聖人止曰隼者禽也弓矢者器也射之者人也君子藏器於身待時而動何不利之有

振

龍泉薄范伯崇寄書來云今日氣象官無大小皆難於

有爲蓋通身是病無下藥處耳安得大賢君子正其根本使萬目具舉吾民得樂其生耶嚴陵之政遠近能言之蓋惻隱之心發於誠然加之明敏何事不立方

上初召魏公先召南軒來某亦赴召至行在語南軒云湯進之不去事不可爲莫擔負了他底至於敗事某待得見魏公時親與之說度住不得一二日去矣及魏公來湯左相張右相都不可商量事同進同退獨

與上商量又不得上又要商量但時召南軒入往來傳言與魏公商量一日召南軒上在一幄中外無一人說話甚欵南軒開陳臨安不可居乞且移蹕建康然宮禁左右且少帶人又百司之類亦且帶緊要底去上曰朕獨行后妃宮禁之類全不帶一人去臨安淫侈之甚如何居南軒祝上未須與人說相將又謁上曰朕不言卿不須漏洩上因曰待朕取一文字與卿看上顧左右無人使遂曰卿且待上自起去取南

軒見幄外皆是宮人深懼所言皆爲彼聞之矣少頃上來忘其文字其後與宰相議用兵事湯固力爭上曰朕旦夕親往建康未幾外面閑閑地謂上往建康南軒見上問云陛下嘗祝臣勿言聞陛下對宰執言之何也上曰被他撓人故以此激之

意思如此  
記不全

南軒

出入甚親密滿朝忌之一日往見周葵政府諸人在次第遂報南軒來周指之曰吾輩進退皆在此郎之手是時南軒少年又處得地位不是而人情皆如此

何以成得事南軒亦問至太上處理會事之類太上  
曰尚記得卿父娶時如何事卿今如此南軒奏邊事  
并不可和之意太上亦順應之臨辭去乃曰與卿父  
說不如和好湯在相位時有御札出來罵亦有秦檜  
不如之語然竟用之不可曉恐是太上意上因廣西  
買馬事之類甚向南軒諸公已忌之後到荆南趙雄  
事事沮之不可爲矣先生又言近有誰說在荆南時  
司天奏相星在楚地甚明上曰張栻當之人愈忌之

揚

卷一百三

南軒再召時論今日自是當理會恢復然不如此理會  
須是云云有劄子上大喜次日降出劄子御批恢復  
須是如此理會即除侍講云且得直宿時與卿說話  
虞允文趙雄之徒不喜遂沮抑揚

南軒自魏公有事後在家凡出入人事之類必以兩轎  
同其弟出入揚

議南軒祭禮曰欽夫信惑猛又學胡氏云云有一般沒

人情底學問嘗謂欽夫曰改過不吝從善如流固好  
然於事上也畧審覆行亦何害

南軒只以魏公繼室配又以時祭廢俗祭

某屢言之

○伯羽

因說南軒爲人作文序曰欽夫無文字不做序

淳

南軒從善之亟先生嘗與閑坐立所見什物之類放得  
不是所在并不齊整處先生謾言之雖夜後亦即時  
令人移正之

春風駘蕩家家到天理流行事事清此南軒題桃符云

爾擇之譏之

方

欽夫言老子云不善人善人之資善人不善人之師與  
孔子見賢思齊見不賢內省之意不同爲老子不合  
有資之之意不善也

方

朱子語類卷一百三